

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 129 del 22/01/2026

L argument zentrèl de la scontrèda l é stat l Pian de la Informazion e la spartijon del Fondo provinzièl de la mendranzes linguistiche per l 2026

Conferenza de la mendranzes, Marchiori: “Na scontrèda per rejonèr del davegnir de noscia comunanza”

[Ladino] En mercol ai 21 de jené, domesdì via, te Sala Depero del Palaz senta de la Provincia autonoma de Trent, se à dejout la XLI Conferenza de la Mendranzes, l organism che se bina e che se met a confront su la politiches per la popolazions de mendranza linguistica ladina, mochena e zimbra. L argument zentrèl de la scontrèda l é stat l nef Pian de la Informazion e la spartijon de la quotes del Fondo provinzièl mendranzes per l 2026, estra che i neves criteries di ejames per l zertament e la valutazion de la cognoscenza del lengaz e de la cultura de mendranza e autra scomenzadives. L Assessor Provinzièl a la politiches per la cèsa, patrimonie, demanie e promozion de la cognoscenza de l’Autonomia, Simone Marchiori, à orì i liurieres e te sie intervent l à volù meter al luster l emportanza de chesta ocajon per binèr ensema, en prejenza, la Conferenza. “N moment de confront, de aprofondiment, de crescimonìa e per se cognoscer, no demò tel enteres de la mendranzes linguistiche, ma de dut l teritorie, per rejonèr del davegnir de noscia comunanza: fundamentèl n moment de Autonomia”, à dit l assessor.

À tout pèrt n muie de comembres, anter chisc l assessor regionèl a la promozion de la mendranzes linguistiche Luca Guglielmi, i raprejentanc istituzionèi di comuns e de la comunitàdes de mendranza, i raprejentanc di istituc culturèi ladin, mochen e zimber, i sorastanc de la istituzions scolastiches e formatives che laora sul teritorie, l President de la Union di Ladins de Fascia e l President de la Union Generèla di Ladins dla Dolomites. A chesta scontrèda à tout pèrt ence la dirigente del Servije Mendranzes linguistiche e relazions esternes Elisabetta Sovilla.

Con referiment al Pian de la informazion de l’editoria, l program l perveit l sostegn a scomenzadives che favoresc l sparpagnament di lengaz de mendranza ence sorafora la seides de sie teritories, da man di Istitut Culturali e del Comun General de Fascia. Anter chestes, la pates periodiches sui sfoes, i notizières de la setemèna, la trasmiscions radio e la produzioni web e che vegn fora sui desvalives canai, i corsc per emparèr l lengaz e desvaliva autra ativitàes editorièles e de comunicazion che permet de smaorèr la perferida informativa, de smaorèr l numer de utenc e de miorèr la calità del lengaz de la informazions. Tel Fondo provinzièl per la tutela de la popolazions de mendranza l é presciapèch a la leta 700 mile euro e l tol ite, estra che chisc intervenc de sostegn a la informazion tel lengaz de mendranza, intervenc metui a jir da la Provincia, scomenzadives e projec de gran valuta per la tutela de la mendranzes linguistiche proponec da aministrazions locales, istituzions scolastiches e istituc culturali e l finanziament de la ativitàes culturèles e de politica linguistica del Comun General de Fascia. Apede chisc vegn pervedù ressorses de enjonta per amò de etres desvalives empegnes, anter chisc la trasmiscions de ORF1 e ORF Sport che à desche obietif chel de ge arseguirèr a duc de poder veder canai de la televizion de lengaz todesch. A chesta vida sul Fondo l é a leta 900 mile euro en dut.

Anterite, te chesta scontrèda, l'é stat envià via ence n confront en cont de vèlch mudament tel regolament che stabilesc i criteries e la modalitèdes per l zertament de la cognoscenza di lengac de mendranza e sia zertificazion, che passenea la modalitèdes di ejames aldò del standard QCER.

Fotoservije e filmat del Ofize Stampa

Chiò dawnload images e intervista.

<https://www.youtube.com/watch?v=vOEecWcBMtI>

Traduzion di Servijes Linguistics e Culturèi del Comun general de Fascia

(cdt)